

**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ԿԵՆՏՐՈՆԱԿԱՆ ԸՆՏՐԱԿԱՆ ՀԱՆՁՆԱԺՈՂՈՎ**

**11 հուլիսի 2021թ.
ք. Երևան**

N 186-Ա

Ո Ր Ո Շ ՈՒ Մ

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱԶԳԱՅԻՆ ԺՈՂՈՎԻ 2021 ԹՎԱԿԱՆԻ
ՀՈՒՆԻՍԻ 20-Ի ԱՐՏԱՀԵՐԹ ԸՆՏՐՈՒԹՅՈՒՆՆԵՐԻՆ ՄԱՍՆԱԿՑԱԾ ՀԱՅԱՍՏԱՆ
ԴԱՇԻՆՔԻ ԸՆՏՐԱԿԱՆ ՑՈՒՑԱԿՈՒՄ ԸՆԴԳՐԿՎԱԾ ՊԱՏԳԱՄԱՎՈՐԻ ԹԵԿՆԱԾՈՒ
ՄԽԻԹԱՐ ԶԱՔԱՐՅԱՆԻ ՆԿԱՏՄԱՄԲ ՔՐԵԱԿԱՆ ՀԵՏԱՊԵՂՈՒՄ ՀԱՐՈՒՑԵԼՈՒ
ՎԵՐԱԲԵՐՅԱԼ ՀԱՄԱՁԱՅՆՈՒԹՅՈՒՆ ՏԱԼՈՒ ՄԱՍԻՆ**

Հայաստանի Հանրապետության գլխավոր դատախազության կոռուպցիոն հանցագործությունների գործերով վարչության ավագ դատախազ Ա. Օսեյանի կողմից 08.07.2021թ. N 36-181-21 գրությամբ Հայաստանի Հանրապետության կենտրոնական ընտրական հանձնաժողով ներկայացվել է միջնորդություն՝ Հայաստանի Հանրապետության Ազգային ժողովի 2021 թվականի հունիսի 20-ի արտահերթ ընտրություններին մասնակցած Հայաստան դաշինքի ընտրական ցուցակում ընդգրկված պատգամավորի թեկնածու Մխիթար Զաքարյանի նկատմամբ քրեական հետապնդում հարուցելու վերաբերյալ համաձայնություն տալու մասին:

Հայաստանի Հանրապետության կենտրոնական ընտրական հանձնաժողովը 2021 թվականի մայիսի 31-ին կայացրել է «Հայաստանի Հանրապետության Ազգային ժողովի 2021 թվականի հունիսի 20-ի արտահերթ ընտրություններին մասնակցելու համար Հայաստան դաշինքի ընտրական ցուցակը գրանցելու մասին» թիվ 57-Ա որոշումը, որով գրանցել է Հայաստան դաշինքի ընտրական ցուցակը՝ Հայաստանի Հանրապետության Ազգային ժողովի 2021 թվականի հունիսի 20-ի արտահերթ ընտրություններին մասնակցելու համար:

Հայաստան դաշինքի ընտրական ցուցակի 17-րդ հերթական համարի պատգամավորի թեկնածու է գրանցվել Մխիթար Սեյրանի Զաքարյանը:

Կենտրոնական ընտրական հանձնաժողովը 2021 թվականի հուլիսի 10-ին, ժամը 20:00-ին հրավիրված արտահերթ նիստում ստացվել էր պատգամավորի թեկնածու Մխիթար Սեյրանի Զաքարյանի դիմումը, որում նշվում է. «Խնդրում եմ, Իմ նկատմամբ քրեական հետապնդում հարուցելու և ազատությունից զրկելու հարցում համաձայնություն ստանալու միջնորդության քննության համար այսօր ժամը 20:00-ին նշանակված նիստը հետաձգել ողջամիտ ժամկետով՝ հնարավորություն ընձեռելով, որ կարողանամ ներկա գտնվել դրան և իրացնել իմ իրավունքները:»:

Կենտրոնական ընտրական հանձնաժողովը բավարարելով պատգամավորի թեկնածու Մխիթար Սեյրանի Զաքարյանի դիմումը՝ 2021թ. հուլիսի 10-ի, ժամը 20:00-ին նշանակված նիստը հետաձգեց և նշանակեց 2021թ. հուլիսի 11-ին: Նիստի օրվա և ժամի մասին Մխիթար Սեյրանի Զաքարյանին ծանուցելով՝ հեռախոսահամարին հաղորդագրություն ուղարկելու միջոցով:

Պատգամավորի թեկնածու Մխիթար Սեյրանի Զաքարյանը չնայած ծանուցվել էր քրեական հետապնդում հարուցելու վերաբերյալ համաձայնություն տալու մասին միջնորդության քննարկման օրվա և ժամի մասին, սակայն նիստին չներկայացավ:

«Հայաստանի Հանրապետության ընտրական օրենսգիրք» Հայաստանի Հանրապետության սահմանադրական օրենքի (այսուհետ՝ նաև Ընտրական օրենսգիրք) 90-րդ հոդվածի 5-րդ մասի համաձայն.

«Պատգամավորի թեկնածուի՝ մինչև պատգամավորի լիազորություններն ստանձնելն ընտրված պատգամավորի նկատմամբ քրեական հետապնդում կարող է հարուցվել միայն Կենտրոնական ընտրական հանձնաժողովի համաձայնությամբ: Առանց Կենտրոնական ընտրական հանձնաժողովի համաձայնության՝ նա չի կարող զրկվել ազատությունից, բացառությամբ, երբ նա բռնվել է հանցանք կատարելու պահին կամ անմիջապես դրանից հետո: Կենտրոնական ընտրական հանձնաժողովը նշված հարցի վերաբերյալ որոշում ընդունում է հանձնաժողովի անդամների ընդհանուր թվի ձայների առնվազն 2/3-ով: Սույն մասով սահմանված դրույթը չի տարածվում մինչև թեկնածու գրանցվելը ձերբակալված կամ կալանավորված քաղաքացիների, ինչպես նաև ձերբակալված անձի նկատմամբ կալանքը որպես խափանման միջոց ընտրելու և նշված անձանց կալանքի ժամկետը երկարաձգելու դեպքերի վրա»:

Քննարկելով ներկայացված միջնորդությունը և ղեկավարվելով Ընտրական օրենսգրքի 90-րդ հոդվածի 5-րդ մասի պահանջով՝ Հայաստանի Հանրապետության կենտրոնական ընտրական հանձնաժողովը

Ո Ր Ո Շ ՈՒ Մ Է.

Միջնորդությունը բավարարել՝ տալ համաձայնություն Հայաստանի Հանրապետության Ազգային ժողովի 2021 թվականի հունիսի 20-ի արտահերթ ընտրություններին մասնակցած Հայաստան դաշինքի ընտրական ցուցակում ընդգրկված պատգամավորի թեկնածու Մխիթար Զաքարյանի նկատմամբ քրեական հետապնդում հարուցելու վերաբերյալ:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿԵՆՏՐՈՆԱԿԱՆ ԸՆՏՐԱԿԱՆ
ՀԱՆՁՆԱԺՈՂՈՎԻ ՆԱԽԱԳԱՀ**

Տ. Մ ՈՒԿՈՒԶՅԱՆ